



Synfocity = 405

30th August, 2012

mail us at : mzsynfo@gmail.com; mizoramsynod@gmail.com - Phone - 2314648

□ Ramthar Ni

August 31 (Zirtawpni) hi Ramthar Ni a ni a, Mizoram Presbyterian Kohhran tan Ni pawimawh bik a ni. A chhan chu Mizorama Presbyterian Kohhran rawn dintu Rev. David Evan Jones (Zosaphluia) Mizorama rawngbawl tura a lo thlen ni a nih vang a ni. Kum 1972 Mizoram Synod Inkhawmpui chuan, Synod Ramthar Board-in, 'August ni 31, Pu Zosaphluia Mizorama a lo thlen ni hi Synod Ramthar Ni atan hman ni se', tia a rawtna chu pawmin kum 1973 atang khan August 31 chu Ramthar Ni atan hman tan a lo ni ta a ni.

Mizorama Chanchin tha rawn thlentu hmasa ber (Pioneer Missionary) Rev. William Williams chuan Khasi rama a thawh laiin Syhlet lama Mizo lung in tangte hnen atanga Mizote chanchin a lo hriatin Mizorama kal duhna a nei ta a. Kum 1891 March 20 khan Aizawlah a lo kal a, Mistiri leh kut hnathawka inhlawhfate hnenah Pathian thu hriilin tract te a sem a. Mizoram chanchin hi Welsh ramah a zu sawi a, Welsh Presbyterian Mission chuan kum 1892-ah Mizoram chu Missionary tirh luhna atan a thlang ta a. Rev. William Williams hi tirh an tum a, mahse vanduaithlak takin a thi ta mai si a. Mi thar an dap leh a; Theological College-a an zirtir chhungin hun a lo vei hman a. Hetih lai hian Arthington-a mi tirh Rev. F.W. Savidge (Sap Upa) leh Rev. J.H. Lorraine (Pu Buanga) te kha an lo chhuak a, kum 1894, January 11-ah Mizoram an lo thleng a; Welsh Presbyterian Mission tirhin Rev. D.E. Jones (Zosaphluia) hi kum 1897, August 31-ah a lo thleng ve leh ta a ni.

Mizoram Presbyterian Kohhran chuan kumin Ramthar Ni pual hian tum khat inkhawm atan chauh programme a siam a, thupuihah 'Hnai taka mi thim hnen Chanchin Tha Hril' (II Timothea 4:1-5; Matthaia 28:18-20) tih an hmang ang.

♦ Ramthar Ni (August 31) hian Synod Mission Board thawktute hetiang hian Kohhran hrang hrangah hun hmangin an insem darh ang:

Kalna Kohhran	Kal chhuakte
♦ Madanrting, Shillong	- Rev. Lalchuanmawia, SMB Secretary
♦ Thentlang	- Rev. Lalthankhuma, Lecturer, MTC
♦ Riangtlei	- T. Upa Lalhmingthanga, Mission Promoter & Upa B. Lalrinliana, BEC Member
♦ Hmunnghak	- Pu R. Lalchhanhima, Cir. Manager, RTCCB & Upa Vanlalchhunga, BEC Member
♦ Darlung Bial	- Upa H. Ngurkhuma, Mission Promoter; Upa Lalhriata, Pensioner; Pu Lalthuamkunga, Pensioner & Pu Zarzolianna, Pensioner
♦ Lungdai	- Upa D.P. Biakkhuma, Synod Secretary

□ Missionary Training College

Missionary Training College zirlaite chuan Ramthar Ni (August 31) chawhma dar 10:00 atangin MTC, Mission Vengthlang-ah thisen pek runpui an nei dawn a, Synod Hospital, Durlang atangin thisen la tur an kal ang.

□ PBS Graduation Service

August 23 khan Presbyterian Bible School (PBS) chuan Pi Zai Hall, Synod Conference Centre-ah Session 25-na Graduation Service an hmang.

Graduation Service programme hi Senior Executive Secretary Rev. Vanlalzuatan kaihruiin hunserh a hmang a, Rev. H. Biakthansangan Presbyterian Bible School-a thawktute, Board member leh zirlaite inhmelhriattirna hun a hmang a, PBS Principal Rev. R. Lalengmawian report a pe bawk. Synod Moderator Rev. Thangzauvan thuchah sawiin zirlai pass chhuakte hnenah certificates a hlan a, PBS Board member Rev. Dr. R. Lalbiakmawian exam-a ti thate leh class kal kimte hnenah lawmman a hlan a ni. Ni. Zoramchhanin zaiin kalkhawmte a awi a, Upa D.P. Biakkhuma, Synod Secreatry-in zir chhuakte tawngtaisakna hun a hmang a, Board member Rev. Vanlalchhuangan fuihna thu a sawi a, zirlai aiawhin thusawi a awm bawk. Rev. R.K. Lalnunmawian lawmthu sawina hun a hman zawhah Rev. C. Lalsanglianan malsawmna sawiin a tin a ni.

Presbyterian Bible School hi kum 2004 May thla atangin tan a ni a, a din tan tirh atangin zirlai 1023 zinga 844-in an zirchhuak tawh a. Session 25-naah hian zirlai 72 an awm a, chung zinga 63 chuan zir tuan chhuakin an pass a; First Division-ah 12, Second Division-ah 31, Third Division-ah 11, Simple Pass 9 an awm a, Exam lo 5 leh Failed 4 an awm bawk. Tun tumah hian a ti tha zual top 3 position-ah mi 4 an awm a, chungte chu:-

1. Samuel Lalremfima s/o H. Lalsiama, North Mualcheng Kohhran
2. Lalnunfeli d/o Lalhriata, Mamit Kohhran
3. R.D. Lalruatfela s/o R.D. Tinthanga, Seling Kohhran
3. Jerry Lalrintluanga s/o Zosangliana, Khatla North Kohhran

Presbyterian Bible School atanga zirchhuakte hi rawngbawlina tangkaiah an inhmang zui hlawm a, Missionary leh Social Worker-a tang zui tam tak an awm a, B.Th. leh BD zir zawm thahnem tak an awm tawh a, Synod Revival Speaker zinga tam takin heta tang hian Pathian thu an zir chhuak tawh bawk a ni.

□ Rev. Zosangliana Colney Sermon Lakkhawm tlangzarh

Vawiin (Aug. 30) chawhnu dar 2:00 khan Synod Committee Room, Zosaphluia Building (Top Floor)-ah Rev. Zosangliana Colney Sermon Lakkhawm lehkhabu chu Rev. Vanlalzuata, Senior Executive Secretary-in a tlangzarh.

Lehkhabu tlangzarh inkhawm hi Upa K. Rosiamliana, Khatla-in kaihruiin Upa C. Sangzuala, Chaltlang-in lehkhabu thlirlawkna hun a hmang a. Rev. Vanlalzuata, Senior Executive Secretary-in lehkhabu hi a tlangzarh a, he lehkhabu buatsaihtu Tv. Hminga Pachuau leh Rev. Zosangliana Colney ten thusawina hun an hman zawhah a duh apiang tan thusawina hun hawn a ni a, Khatla Kohhran Female Voice-te an zai bawk.

□ Zin

♦ Rev. Vanlalzuata, Senior Executive Secretary chuan Ramthar Ni (August 31) hian Thingsul Tlangnuam Kohhranah hun a hmang ang a, Pathianni (Sept. 2) chamin September 3 (Thawhtanni)ah a lo let leh ang. Rev. Vanlalzuata hi Pu P.C. Lalchawia, Hualngohmun-in a tawiawm ang.

♦ September 3 & 4 hian Pastor Bial then chungchang ngaihtuah turin Khawhaiah Rev. Lalzuithanga, Executive Secretary a kal ang.

♦ August 27 - September 1 chung hian TDS Return leh Account endik turin Tv. Zaihmingthanga Fanai, Accountant chu Guwahati leh Shillong-ah a zin mek.

- ☐ **Kohhran Hmeichhia**
 NGO pakhat Francois Xavier Bagnoud (FXB) (2001) leh Positive Women Network (2007) te tangkawpin HIV Positive Hmeichhiate inenkawlna damdawi (ART) laa Aizawl an cham chung riahna tur hmun Short Stay Centre an buatsaih tur tanpui nan Central Kohhran Hmeichhia chuan August 27 (Thawhtanni) khan ₹ 20,000/- (Cheng Singhnih) a hlan.
- ☐ **Campus Ministry**
 Rev. V.L. Krosschuanmawia, i/c Campus Ministry chuan hetiang hian hun a hman ang :
 ♦ August 31 (Zirtawpni) Chawhnu : Synod Higher Secondary School
 ♦ September 3 (Thawhtanni) Chawhma : Govt. Mamawii High School Section
 ♦ September 4 (Thawhlejni) Chawhma : Apollo School of Nursing
- ☐ **Synod Social Front**
 September 1 (Inrinni) hian Lungleng North Kohhranah Intodelh Seminar neih a ni dawn a, seminar neihpui tur hian Dr. Saithantluanga, Economic Cell Member leh Pu Lalrosanga Colney, Synod Office te an kal ang.
- ☐ **Synod Office chawlh**
 August 31(Zirtawpni) hi Ramthar Ni anih avangin Synod Office leh Synod hnuaiia Department hrang hrangte an chawl ang.
- ☐ **Hmangaihna In**
 Pi Laldawnkimi, Hmangaihna In Superintendent chu August 28 - 30 chungin National Institute of Public Cooperation and Child Development (NIPCCD), Guwahati-ah Orientation Training for Superintendent of Child Care Institution hmangin a kal.
- ☐ **News from Museum & Art Gallery, ATC**
 Aizawl Theological College chuan Museum & Art Gallery-a dah tur thil lawmawm tak mai a dawng leh ta a. Tunlaia thalai, pavalai leh nuvalai, nu leh pa zawng zawng awi tleitu hla duhthlan zing ami, "*Ka duh tu dang mah an awm lo*" tih hla a ni a. Freddy Lalruatsanga leh Zosangzuala Chhangte te'n mi tin lungdum zawng taka thiam fahrana an sak lar hi a ni. Thenzawla KTP General Conference, 2012-ah pawh a hla "hit" ber pawl a nih kha!
 ATC-a a lo luh dan hi a kual deuh va. Kum 2011, January 18 zan dar 7.30-ah khan Archives Hall, Babu Tlangah Freddy-a Gospel Music Video Album tlangzarh inkhawm neih a ni a. Album thlirlawkna (preview) hmangtu Pi C. Luri chuan thiam zet maiin video album-a hlate a fakselnaah, "*Ka duh tu dang mah an awm lo*" tih copy a ken chu a phuahtu L.B. (Lalbela) Hrahse kutziak ngei thlak (photocopy) a nih thu a sawi chhuak a. Album tlangzarhtu ATC Principal beng a verh ta tlat a. Chuta tang chuan a phuahtu kutziak tak chu khawiahnge a awm tih chhui chhuah a ni ta a. He hla tha chungchuang tak mai hi Lalbela Hrahse, Digboi Oil Coy.-a security force-a thawk, Digboi-a ni nih/thum a bethel hnu-a, June 3, 1966-a a lo ziak daih tawh a ni a. Amah pawh October 20, 1978-ah ropuina ramah a lo lawi lut tawh a. Mahse, a hla hi chu Zoram hla chuai thei lo turte zing ami niin a lang.
 A hla hlut dan ngaihtuahin dil chhuah theih loh mai palh hlauh avangin engemawchen pehheh a ni a. A tawpah a phuahtu L.B. Hrahse fapa, Pu H. Lalmuanpuia, zai mi baw, New Serchhip Presbyterian Kohhrana Tual Upa, chu biak pawh a ni ta a. North Vanlaiphai Damdawi Veng Pastor Bial KTP Inkhawmpui-a rawngbawla kal ATC Principal leh Zosangzuala te haw lam chuan, January 23, 2012 khan an chenna Inah an pan ta chawt a. Pu Muanpuia leh a nupui Pi Lalchhuanawmi chuan tukthuan buatsaih meuhvin an lo dawngsawng a.
 Phal takin an pa duh tak, L.B. Hrahse hla zia khawmna bu pheh 72-a chhah, a kawm tla tawh chu an han phawrh ta mai a. A hawrawp a mawiin a thuziak a felfai em em a. Ama siam chawp writing pad-a a thil lem ziak mawi dangdai tak takte chuan, pa namai a nih loh zia an hril Chiang Hle. Hemi tum hian a bu puma dil chu a hawihhawm lo deuhva hriain, "*Ka duh tu dang mah an awm lo*" tih pheh chauh chu an dil angin zai thlak a ni a.
 ATC-a hla pheh hawn thlen a nih chuan Faculty member-te chuan a bu ngeia neih loh chu an lo kham khawp hauh lo mai a. A bu puma neih sak dil chu awm lo viauvin lang mahse, Pu Muanpuia chuan, "A bu puma in kaw duh chuan kan lawm khawp ang", a lo ti leh ta then a. ATC Principal leh Zosangzuala te bawkin Serchhip Pastor Bial KTP Members' Meet-a rawngbawlna an neih tumin June 24, 2012-ah khan, Pu Lalmuanpuia te nupa kut atangin a bu pumin an dawng leh ta zawk a ni.
 A phuahtu L.B. Hrahse talent ropuizia hi sawi thiam har khawp a ni. A hlabu rual hian a lehkhathawn pahnih dawn tel a ni a. Pakhat chu a hla phuah dan a thian hnena a thawn a ni a. Pakhat dangah chuan a bul tannaah "Dear" tiin a thianpa hming aiah a lem fiah leh mawi takin a ziak a; a tawpa ama hming zia kana turah "Yours sincerely" tiin ama lem a ziak leh a. Hun hrang hranga a lehkhathawn zia kana a hun rem ang zelin milem/thil lem chi hrang, mawi tawh tak a ziak fo baw a ni. A kutziak a mawiin, a fiah tha em em a. He kutziak hlabu-ah hian a hun laia Sap hla Mizo tawnga lehlin lar zual chu a kim thawkhat hlein a lang.
 ATC Museum & Art Gallery Committee Convener Prof. T. Vanlaltlani leh member te chuan he hla tha chungchuang tak chuanna kutziak lehkhaw hi lawm takin an dawng a. Committee chuan a kawm siamin ATC Museum & Art Gallery-ah a hmu duh apiangte en theih turin a dah a. Apetu Pu Muanpuia te chungkaw chungah a lawmin, kawng tinrenga Pathian malsawmna a duh sak a ni.
- ☐ **Hruaina Eng FM Radio & TV Programme**
 ♦ **AUGUST 31 (FM Radio @ 7:30 p.m.) :**
Choir : The Leprosy Mission Choir - Chawl hman kan ni lo, **Solo :** Lianthangpuii - Lal i ni, **Thuchah :** Ramthar Ni Thuchah - Rev. Zosangliana Colney, **Solo :** Buaipui tham Isua - R. Lalbiaksanga, Zodinpuui - Ka Van In khi
 ♦ **SEPTEMBER 2 (TV Programme @ 3:00 p.m. :**
Choir : Chawnpui Pastor Bial Zaipawl - Wylwn, **Thusawi :** Upa R. Lallianzuala - Beihruah lo chhuah dan, **Solo :** Sangzuala Chhangte - Ka lawm e, **Presbyterian Bible School Graduation Service, Choir :** TBZ Choir - Lalnunema kiangah
- ☐ **Susamachar Prasaran Programme**
September 2 (Pathianni) 5:00 pm. Hindi Gospel Programme (Susamachar Prasaran) :
Group/Choir/Solo : Chawnpui Kohhran - Thandi Howe, **Group/Choir/Solo :** Central PYF Choir - Krus Par, **Sermon :** Rev PC Rohlira - Isu masi papyangko pyar kanewala, **Group/Choir/Solo :** The Leprosy Mission Choir - Ham Soup Te He, **Group/Choir/Solo :** Tuikual Pastor Bial - Prabhu Mere
- ☐ **Moderator Programme**
 Synod Moderator Rev. Thangzauva leh Pu Saidinga Sailo, SMB Mission Promoter-te chuan August 27 - September 4 chungin Patna, Delhi leh Kolkata Mission Field te an tlawh kual ang. August 28 (Thawhlejni) khan Patna Field an tlawh a, August 30 & 31 hian Delhi Field an tlawh leh ang a, September 1 - 3 chungin hian Kolkata Field an tlawh leh ang a, September 4 (Thawhlejni) hian Aizawl-ah an lo let ang.

BEIHRUAL HMAN TAN DAN

- By Laldawnkimi, Superintendent, Hmangaihna In

THUHMA : Kum 1894-ah Chanchintha kan dawng a, kum 1906-ah Harhna tum khatna a lo chhuak a, a tum hnihna pawh kum 1913 ah a lo chhuak leh a, ringtu an pung hle. Mahse hun engemaw chen hnuah harhna chu a lo reh a, Kohhran a lo nguiin a lo chaklo leh ta, rinna kawnga an la ngheh tawk loh avangin han ban leh puk puk te a awm a, khawvel miten nuihzatin "Pathian thu awih leh aichhia chuan thal an hua a nia" an ti thin. Mahse, mi engemawzat rinnaa mi nghet leh rinawm an awm a, phurna hloh mahse thahnemngaihna hloh lovin an thawk zel a. He Harhna hnuah Kohhran han ngui leh chuan mi tam tak hnungtawlhna leh zuaina a siam mai bakah, thawhlawm pawhin a tuar nghal a, 1917-a Tirhkoh tirh chhuah 7 chu thawhlawmin a daih loh avangin an hlawh bi cheng 10 chu cheng 8/- a tihhniam a ni a. Tichuan ringtute intihchak tawna leh ringlote beihna chu hnapuia neih an duh ta a ni. (Mizo Kohhran Chanchin Rev. Saiaithanga phek 54-56, 58)

BEIHRUAL NEIH ANI TA: Hetih lai hian Mizoram Hmar chan pum pui hi Khasi Synod hnuaihan Presbytery pakhat kan ni a, kum khatah vawi hnih (March & Oct) Inkhawmpui an nei thin a, March 15 - 18, 1918 Presbytery Inkhawmpui Aijal-a nei chuan hetiangin a rel a

" Kristian Beihruual-na hi June, 1918 a hian lo awm tan turin kan ruat a. Thla chawhma lam chu mahni Kohhran ho tan a, intih chakna tur leh intih thianghlimna leh intih ngah lawkna atan kan hmang theuh ang a, tin, thla chawhnu lam chu ringlote tana hman tur a ni ang, mi hruai hram turin. Tin, Kohhran tin in an thawh-zia dan theuh tur an ngaihtuah ang".

(Presby. 1918 No.10, Kristian Tlangau May 1918 phek 94)

Rev. Sandia pawhin hetiang hian hriattirna a chhuah a-

Hmar-Chan Presbytery thil-tih chhiar ilang-in, thil pawimawh em em an ruat a ni. Tun June thla chhung hian Hmarchan khaw-tin-ah Pathian Ram tizau turin leh Isua mi zawng zawng tithianghlim turin kan beihruual ang. Hetiang-in tunlai-in India ram pumpui-ah an ti mek a ni. Malsawmna tam tak an hmu tawh a ni. Tin, unau te u, heng thil hi hriatreng a tul a ni. Kan beihrualna hi ti tha tur leh Pathian hming ti-ropui turin, heng thil hi i ti ang u :-

- a) *Nashatak-in tawngtai-in Pathian malsawmna kan dil tur a ni, June thla hma pawhin rei fe an.*
- b) *Kan ngaihtuah fo tur a ni.*
- c) *Kan in-en tur a ni. Kan rilru kan buatshaih tur ani. Sualna zep ilangin malsawmna a dal ang. Isua hnena fel takin kan inpe tur a ni.*
- d) *Engtingge beihrualna hi kan tanpui theih ang, kan ngaihtuah tur ani. Tin, a tumna ber kan hre reng tur a ni. Hapta hnih hmasa chhungin, kohhranho mi ti-harh leh ti-thianghlim turin kan beihram ang. Tin, chu mi hnuah chuan awihlote hnena kal-in kan bei-ruual ang. Heng thil pahnih hi kan Pathian duh zawng ani tih kan hria. Taimatakin i ti ang u. Tin, kan Kohhranho tin in malsawmna ropuitak an hmu ang tih kan beisei. Beihruual thatna tur chu tawngtaiin i dil fo ang u. (Kristian Tlangau May 1918 phek 99)*

Hemi tuma an hman dan Lalnawka khua Lungsum leh Lalzika khua te chuan an report bawka a, a ngaihnawm hle (Kristian Tlangau Sept 1918 phek 172, 180) Aizawl hmuna an hman dan report Sandia Sap leh Liangkhaia te ziak hetiang ani:

"..... June nikhat zan atang khan inkhawm kan lo tan ta a, Pathian in mal min shawm shak a, keini Kohhran a mawi lovin kan inkhawm chu kan lo hlim ta hle mai a, zan khat zan a pang chuan inkhawm kham lovin kan lo tin ta hial mai a; chumi Kohhran chhunga inkhawm chhung chuan, mi in ah emaw, Biakin ah emaw inkhawm mah ila, kan hlim hle fo thin a, uar hauh lova shawi pawhin hlim reng rengin kan tum tla, tih theih a ni e.

Tin, thla chanve a lo ral dawn Pathianni wawi thum zan ah chuan Inpumpekna inkhawm kan nei a Chu mi inpumpekna ah chuan "Inpumpekna lehkha" an ti a, Pathian hnena kan thu tiam zawng zawng kan lo thlah thlam tawh shi kha chawk harh leh turin In tiam na lekha te tak te mi zawng zawng hnena an shem a. Tin, mi pakhatin Pathian hnena inpek tharna lam thu a shawi a; han ngaih thlak meuh chuan kan Pathian thu awina hi a lo pan deuh tak a lawm maw ! tiin kan in shit theuh mai a "Tun hma lam ai kha chuan ka va bei nasha deuh tawh dawn em" kan ti rilru theuh a ni. Tin, thu shawi zawh a chuan "In-pum-pek thawh-lawm" an ti a, thawh-lawm kan upa ten an khawn bawka a, chu tah pawh chuan ni dang ai chuan kan thawh tam zawk theuh a ni awm a, chu mi tum maiah chuan cheng 14/- lai kan ngah a. Tin, chu tah chin a chuan Pathian thu awi lo ho kan bei tan ta a. Mi lian deuh in mi lian deuh an bei a, mi te deuh in mi te deuh kan bei a, nula in nula, tlangval in tlangval, pitar in pitar, putar in putar, naupang in naupang, mahni tum tawk theuh kan bei a. Pathian in chakna min pek avangin tumahin hlau lo leh zak lo leh ning lovin kan bei theuh va: ruah sur chung te pawh hian kan bei zel a kan lawm em em vek a ni....."

Khaw hrang hrang atanga Beihruual vanga hming pe thar mi 344 an ni.

(Kristian Tlangau Oct. 1918 phek 194-195)

Hetianga June 1918 ah hlawhtling taka an hman avangin October, 1918-a Champhai Hmunhmeltha khuaa Presbytery chuan "Beihrualna hi awm leh sela kan ti tlang a, kum 1919 September a ni ang, a tih dan tur chu hmana mi ang bawka khan a ni ang". tiin a rel leh ta a ni (Presby. Oct. 1918 No.11)

Ringtuten thahnemngai taka an tawngtaina leh an beihna chu Pathianin mal a sawm a, kum 1919 ah chuan Harhna tum thumna a lo thleng leh ta nghe nghe a nih kha.

HMAN HUN : Kum 1918 ah June , 1919 leh 1920 ah September, 1921 ah January ,1922 - 1924 ah April thlaah te hman thina ni a, mumal taka September thla kan hman hi 1925 atangin a nih hmel e. (Presby. Oct. 1920 No.25, Oct. 1921 No.33, Assembly 1925 Jan No. 18)

THU ZIR : Standing Com. rel angin kum 1937 atangin ram pum huap thu zir bik siam tan niin a lang, " Kan Kohhran kum tin Beihruual hi fel zawka kan tih theih nan Beihruual programme ram pum tan siam ila, kan subject chu Insumna thu lam nise" (SC dt.28.6.1937 No.7). Mizoram buai avangin ram pum huap zir tur siam loh tum a awm a, hengah hian mahni Kohhran remchan anga buatsaih leh hman a ni. Hapta hmasa ber Ramthar hapta hi 1981 atanga hman tan a ni a, Hapta lina Kristian Chhungkaw hapta hi 1983 atanga hman tan a ni.

BEIHRUAL THLA HMAN DAN TIHDANGLAM RAWTNA :

Aizawl West Presbytery-in Beihruual thla hman dan tihdanglam a rawtna chu 2001 Synod chuan tha tiin SEC bawhzui turin a dah a (2001 Synod Gen.5) Questionnaire-te siama ngaihdan hrang hrangte lakkhawm anih hnuah tihdanglam dan tur hetiang hian rel a ni :

- 1) Beihruah hi September thlaah hmang zel ila.
- 2) Tualchung Kohhranin remchang leh tha atih angin Biak in leh in lamah hman pawlh thin a ni ang.
- 3) Thupui hi rampum huapin Synod-in ala siam zel ang a, amaherawhchu a thupui leh Bible chang tarlan bakah a kaihhraina thuziak hi chu tuna kan hman lai aia tawi fel zawka siam tur a ni ang.
- 4) Mahni Kohhran tan tangkai leh sawt zawka hmang duhte tan zau zawka zalenna pek a ni ang.
- 5) Kan Kohhran hmalakna pawimawh - Kristian Chhungkua, Ramthar leh vantlang nun siamthatna (Social concern) lam thilte hi hlamchhiah loh tur a ni ang. (SEC 185: 7; SEC 186:7; SEC 187:29)

Synod Bu 2011

Synod Bu 2011 chu peih fel a ni ta a, Synod Office Mamawh lamna atangin Kohhran/Bial copy tur a lak leh theih ta e.

NILAI THUPUI TIHDIKNA

Kum 2012 Nilai zan leh Beihruah Thupui Buah hian Bible chhiar tur dah loh leh a dik lova dah a lo la awm a, chungte chu :

1. August 29-a Isa. 58:5 - 7 tih hi Isa. 54:1 tih tur,
2. September 3-ah Tirh. 1:6 - 8 leh
3. September 4-ah Tirh. 16:6 - 10 dah thar a ni e.

Editor, SL&PB

PATHIAN THU ZIR DUH TAN

Presbyterian Bible School, Mission Veng-ah Session 26-na atan Certificate in Theology (C.Th) Admission hawn a ni a. Dil duhte tan a hnuacia tarlan hi hriat tur a ni e.

- ☞ Admission Form : Office hun chungin Rs. 10/- a lei theih a ni
- ☞ Dil hun chung : September 3, 2012 (Thawhtanni) tlai dar 3:00 thleng
- ☞ Dil thei chin : Class VII passed, kum 16 chin, Kohhran dan chungna awm
- ☞ Interview : September 5, 2012 (Nilaini) zing dar 10:00
- ☞ Class tan hun : September 7, 2012 (Zirtawpni)
- ☞ Zir hun chung : September - December, 2012
- ☞ Stipend : Zirlai pakhat hnenah thla tin Rs. 500/- pek a ni ang. Hostel a awm lo.

Hrechiang duh tan Phone No. **857308007/2317343/2350082**-ah zawh theih a ni.

Sd/-
REV. R. LALENGMAWIA
 Principal

SYNOD MISSION BOARD STATISTICS - 2012

SI No.	Hmun	Hawn kum	Missionary	Native Workers	Contract/ Short Term	Total	Ringthar Jan-Jun'12	Craft Centre neih zat	Medical Centre neih zat	High School	Middle School	Primary School
1.	Barak	1975	47	85	21	153	37	2	6	2	1	
2.	Tripura	1986	91	101	42	234	863	3	11	2	3	1
3.	Delhi	1988	7	14	11	32	55	1	2	0	0	0
4.	Kolkata	1988	7	85	3	95	217	2	2	0	0	0
5.	Siliguri	1988	16	15	11	42	41	1	3	0	0	0
6.	Karbi Anglong	1989	80	90	39	209	118	1	8	3	2	2
7.	Arunachal 'E'	1991	35	53	30	118	28	1	6	2	0	1
8.	Lucknow	1999	13	30	11	54	94	-	3	0	0	0
9.	Patna	1999	8	29	12	49	48	1	1	0	0	0
10.	Nepal	2000	17	46	9	72	122	2	8	0	0	0
11.	Arunachal 'W'	2001	39	58	44	141	205	1	7	2	2	1
12.	Home Mission North	1949	80	-	79	159	71	-	7	1	2	6
13.	Home Mission South	1987	48	-	141	189	206	1	9	0	5	12
14.	Assam Field	2008	38	20	28	86	59	-	3	1	0	0
15.	Jharkhand	2008	7	61	16	84	192	1	3	0	0	1
16.	Cachar Tlangram	2009	28	34	28	90	21	1	6	1		5
17.	Masihi Sangati	1979	3	-	133	136	454					
18.	Manipur	1967	1	-	-	1	0	-	0	0	0	0
19.	Mission dang		34	-	21	55	0		1			
20.	Trainees						0					
	a) B.Miss.		6	-	-	6	0					
	b) CTE		3	-	-	3	0					
	c) M.Div./M.Th.		1	-	-	1	0					
	TOTAL		609	721	679	2009	2831	18	86	14	15	29